

1640. Արդ, Ուրպանոս փափն գրէ թուղթ առ թագաւորն Լեհաց յայսմ ամի, Աւրիսի 16, խնդրելով զի օգնեացէ Նիկողայոսին. եւ առ Փիլիպպոս կաթողիկոսի, յորդորելով զսա... զալ յուղղափառութիւն... բայց յաղաքս Լէօպոլսեցւոցն՝ ոչինչ իշէ ի թղթին փափն: Պատրի Պողոսն դառնայ ի Լէօպոլիս, եւ աստի տուեալ նման Հայոց դեսպան ոմն՝ երթայ յէջմիածին: Բայց թէ որպիսի պատասխանի տուեալ իցէ կաթողիկոսն ոչ գտաք վասն Լէօպոլսեցւոցն»: «Կամենից», էջ 139-140:

Այսպիսով, Թորոսովիչի դրութիւնը շարունակուած էր մնալ անորոշ: Եկեղեցիները փակ էին: Ինքը մնում էր առաջնորդ առանց հօտի, որը նրան չէր ճանաչում, առանց ծխի, որը չէր ենթարկում նրան: Տեսնելով իր դրութեան անելիութիւնը՝ Թորոսովիչը սկսեց դարձան որոնել ուրիշ կողմից: Մեկնեց Հռովմ եւ այնտեղ, 1635 թ. Յուլիս 11-ին, Ուրբանոս Ը. պապի ներկայութեամբ, նորից հանդիսաւորապէս արտասանեց հռովմէական դաւանանքի հաւատոյ հանդանակը եւ պապին ճանաչեց իր եկեղեցու պետ:

Թորոսովիչն ընդունուեց մեծ պատիւներով. նրան շնորհուեց pallium (կարգինալական վերարկու), իսկ Լվովի աթոռը հռչակուեց սրբեպիսկոպոսական եւ նրա իրաւասութիւնը տարածուեց Լեհաստանում, Մոլդաւիայում եւ Վալախիայում ապրող հայերի վրայ*): Միեւնոյն ժամանակ, Հռովմում ձեռնարկուեց հայոց պատարագի վերամշակութեան, համաձայնեցնելու համար հռովմէական եկեղեցու կանոններին, որ եւ աւարտուեց 1672 թ. ու պապի վաւերացումն ստանալուց յետոյ, սպառազրուեց Հռովմում:

Հայերը անվերջ հալածուած էին, եւ թէեւ, ինչպէս ասուեց, Վլադիսլաւ թագաւորն ինքը հակառակորդ էր ճնշումների, ամբողջ կաթողիկ շրջապատը եւ, գլխաւորապէս, Մա-

րիա-Լիւդովիկա թագուհին շատ բուռն կերպով պաշտպանում էին միութիւնը եւ ամէն կերպ աջակցում թէ՛ Թորոսովիչի եւ թէ՛ լատին եկեղեցու գործիչների ձեռնարկներին: Վլադիսլաւ թագաւորի մահուանից յետոյ Մարիա-Լիւդովիկան համոզեց նրա յաջորդ Եան Կաղիմիր թագաւորին (Վլադիսլաւի եղբորը) սպառնալ հայերին, որ նրանք կը զրկուեն իրենց ունեցած բոլոր արտօնութիւններից, եւ թէ չհամաձայնուեն միանալ կաթողիկ եկեղեցուն**):

Պայքարը այս պայմաններում դառնում էր խիստ դժուար եւ, թէեւ ունիտոր դարձողների թիւը համեմատաբար քիչ էր, այնու ամենայնիւ նրանք չէին կարող չազդել հայ համայնքի տրամադրութեան վրայ: Այս վերջինի մի մասը, թերեւս ամենազործօնը, այդ պայքարի վրայ ահապէն գումարներ ծախսելով՝ աղքատացել ու զրկուել էր պայքարը շարունակելու հնարաւորութիւնից եւ հետզհետէ դառնում էր անտարբեր դէպի կրօնական հարցերը, իսկ միւս, հաւանաբար ամենախոշոր մասը, յոգնած անել վիճակից՝ սկսեց թողնել ու հեռանալ Լվովից եւ Լեհաստանի սահմաններից աւելի հանգիստ ու ապահով վայրեր: Մեծ մասը անցաւ Մոլդաւիա ու Վալախիա, ոմանք՝ Հունգարիա, իսկ մնացածները՝ ով ուր կարող էր:

Իր հերթին Թորոսովիչը, հայոց եկեղեցիներից առած բոլոր միջոցները վասնելուց յետոյ, տեսնելով կատարեալ սնանկութիւնը իր արկածախնդրութեան՝ սկսեց հաշտութեան կարելիութիւններ որոնել իր հօտի հետ: Հէնց այդ ժամանակներն էր, 1652 թ., որ Փիլիպպոս կաթողիկոսը այցելեց Պոլիս: Թորոսովիչն օգտուեց այդ առիթից եւ նոյնպէս դնաց Պոլիս՝ տեսնուելու համար կաթողիկոսի հետ:

Ի՞նչ անցաւ դարձաւ նրանց տեսակցութեան միջոցին, աղբեցութեան ի՞նչ միջոցներ կիրառեց Փիլիպպոսը, արդեօք Թորոսովիչը զգա՞ց իր ծանր յանցանքը հայ ժողովրդի հանդէպ, թէ՞ Փիլիպպոս կաթողիկոսի անձնական համալը դեր կատարեց, յայտնի չէ: Բայց Թորոսովիչի յետագայ քայլերից երեւում է միայն

*) Հետաքրքրական է նկատել, որ յոյն ունիտորների անհամեմատ աւելի բազմամարդ թեմը երկար ժամանակ մնաց սոսկ եպիսկոպոսական եւ միայն 1807 թ. վերածուեց արքեպիսկոպոսականի:

***) Lizke Cudzoziemcy w Polsce, էջ 80: